



### Dapli laina per la producziun d'energia

En Svizra è vegnì pinà l'onn passà radund trais pertschient dapli laina che l'onn precedent.

4



### Concert da Flurina e Janic Sarott

Dacurt han ils fragliuns Flurina e Janic Sarott concertà en la baselgia da s. Niclà a Scuol.

10

DIE SÜDOSTSCHWEIZ

# LA QUOTIDIANA

Redacziun: Via comerciala 22, 7007 Cuira, tel. 081 920 07 10, fax 081 920 07 15

## Il 27avel chantun svizzer – per ils Rumantschs

In expert per dretg da pievels s'extenda

DA CLAUDIA CADRUVI / ANR

■ Il giurist Thomas Burri relata d'in stadi per ils Rumantschs. I sa tracta dal 27avel chantun en Svizra. El consista da tuts Rumantschs. In territori n'è betg necessari.

Questa primavaira ha Burri referì a la dieta «lingua rumantscha e democrazia directa» che ha gi lieu a Cuira. Oz publitgescha La Quotidiana ina versiun curta dal referat.

«Ils Rumantschs èn in pievel – u forse perfin plirs – ed els han cunquai il dretg da pudair decider sez», scriva l'expert per

dretg da pievels e d'Europa. La Rumantschia mussia segns da digren e dovria finalmain ina vaira dimensiun statalpolitica. Gliez pudess ella chattar cun in nov chantun nunterritorial. La Constituziun svizra porschia la basa ed ils meds latiers.

Il giurist entra perfin en detagls da la concepziun dal stadi da Rumantschs: Ses burgais d'eventan burgais dubels, dal chantun rumantsch e dal chantun d'origin. Ed ina schliaziun per l'imposiziun da taglia è er en vista.

> PAGINA 2

## Pilot ha gaudi – selvaschina stress

Las concurrenz da parasgular a Mustér han era varts negativas

DA HANS HUONDER / ANR

■ L'jamna vargada ha ina gronda concurrenza internaziunala da parasgular giu liug el contuorn da Mustér. Schegie ch'ils pilots ston untgir zonas che periclitescan la selvaschina succedan adina puspei incaps nungivischai. Ensemen cun la survigilanza da catscha han ils organisaturs dallas concurrenz da parasgular fixau zonas che astgan buca vegnir penetradas dils pilots. Las zonas pertuccan oravontut ils asils da catscha. La cunvegientscha ei denton buca vegnida risguardada l'jamna passada da tutas parasguladras e da tuts parasguladers. «Nus havein stuì constatar pliras gadas co la selvaschina ei vegnida surprida e spuentada dils parasguladers. Quei ei inacceptabel», di il guardia-selvaschina Werner Degonda da Cumpadials. El ei trumpaus da quei agir, pertgei ils animals vegnan separai cheutras in da l'auter. Anseuls camutsch ni capricorn vegnan sparti dallas cauras ed



L'activitad da parasgular ei fascinonta. Per la selvaschina che vegn surprida dils pilots e parisols munta ella denton fetg bia stress.

MAD

aschia exponi a prighels. Duessen ils campiadis haver liug mintg'onn regularmein sisum la Surselva vegn ei tenor Werner Degonda ad esser indispensabel da menar ulteriuras discussiuns cun

ils organisaturs, mo era cun las vischnauncas pertuccadas. L'auter onn ei previu a Mustér ina concurrenza dil cup mundial cun 125 participontas e participonts digl'entir mund. En mira ha il trenader na-

ziunal dils parasguladers, Martin Scheel da Cuera, era il campiad mundial. A quel fussen aunc pli biars parasguladers dalla partida.

> PAGINA 3



In collavuraziun cun tuot ils experts da chans da la regiun spordscha la Clinica Alpina SA a Scuol üna nouva spüerta turistica per giasts chi vegnan cun lur bes-chas chasanas a far vacanzas.

FOTO M. FONTANA

## Nouva spüerta per il turissem regional

■ (anr/mfo) Il problem da giasts chi vöglan ir i'l Parc Naziunal Svizzer a chaminar o passantar oters evenimaints sainza laschar lur chan sulet i'l hotel o ill'abitaziun da vacanzas es scholt. Grazcha a la «PASSion», üna cooperativa dad experts da chans e bes-chas chasanas, vegnan las bes-chas chüradas professiunalmaing.

«Cun nouva «PASSion» spordschainta ün'offerta al turissem, la quala po gnir nüzzada sco instrumaint da reclama per ün sectur ch'è fin quia gnü chürà pac bain; nempe ils possessuors da chans», intuna Men Bischoff, pre-

sident da la suprastanza da la Clinica Alpina SA a Scuol. Il motto da la nouva spüerta es: «Vacanzas cun chan, ma listess pudair esser liber, pudair durmir oura, giodair uras da wellness, ir culs skis, far gitas i'l Parc Naziunal, ir a mangiar bain e giodair las vacanzas sainza stuvair avoir noscha conscienza perquai cha'l chan es in quels mumaints sulet.» «I's po però eir cumbinar sias vacanzas cun trattamaints specials pel chan in nouva clinica a Scuol», declera Annatina Denoth, commembra da la suprastanza da quella clinica.

> PAGINA 7

## Ursi Vincenz ella Cuort Ligia Grischa

■ (anr/abc) Dapi ils 5 da fenadur 2014 san ins veser sias creaziuns ella Fermata a Falera. L'artista d'arschella Ursi Vincenz ei presenta leu all'exposiziun collectiva «Sguard silla Surselva» cun dus tozzels figuras. Ellas dattan en egl per in motiv special: Mintgina ei ina simbiosa dils dus materials lenn ed arschella. Ina ragisch, in lenn da Rein ni in auter interessant toc drova ella per dar «veta», per crear zatgei concret e palpabel.

> PAGINA 4

## Festa sül stradun a Scuol

■ (anr/bcs) Per la deschetavla jada ha gnü lö sonda passada la Festa sül Stradun a Scuol. Il stradun d'eira serrà pel trafic dad autos da la 09.00 fin las 24.00 ed ha fat piazza ad ün chaminar e's tratgnair liber. La festa chi fa part al program da la stà da la regiun Engiadina Bassa po be gnir organisada grazcha al grond sustegn dad hoteliers, restoratuors ed affarists. Pro bell'ora e temperaturas agreablas s'han inscuntrats sonda passada indigens e giasts, uffants e creschüts per as tratgnair da cumpagnia.

> PAGINA 7

## Bellezi'aura e bia gliedud

La fiasta d'affons a Laax ei danovamein stada in success

DA HANS HUONDER / ANR

■ Sonda e dumengia ha la 15avla fiasta d'affons giu liug a Laax. La bellezi'aura ha carmialau fetg bia gliedud alla riva dil lag. La fiasta ei daventada ina purschida da stad stabla e tut quellas e quels che han visitau ella ils davos onns savessen strusch s'imaginar ch'ella muncass von-

zeivi. Ils organisaturs han danovamein dau fetg gronda breigia da porscher buna recreaziun allas visitadras ed als visitaders da lunsch e da maneivel. Entuorn il lag ei vegniu dau als affons numerusas pusseivladads da far giugs, examinar igl inschign, mussar curascha ni semplamein sedivertir. Tgi che ha la fin finala giu memia cauld ha saviu far bogh. Il cau

dall'organisaziun, Linus Capaul, sa trer ina bilanza ordvart positiva dils dus dis da fiasta. Ch'igl arranschament ei danovamein daventaus in success cumplein ha plirs motifs. In ei segiramein il grond engaschament da biaras e biars voluntaris, dil reminent buca mo dalla vischnaunca da Laax.

> PAGINA 5



Divertiment e recreaziun per pign e grond. Las cundiziuns per la fiasta d'affons a Laax ein stadas optimalas, oravontut la sonda.

FOTO H. HUONDER



Servetsch d'abunents e da distribuziun: tel. 0844 226 226 mail: abo@somedia.ch